



NEWSLETTER

OLIMPIJSKOG KOMITETA BIH

No.18, mart/april 2023



Dragi sportisti i sportski radnici,
Dragi prijatelji,

Dijeli nas nešto više od mjesec dana do Evropskih igara „Krakow-Malopolska 2023“ koje će se održati u Poljskoj od 21. juna do 2. jula 2023. godine. Ei Krakow Malopolska će biti organizaciono i logistički najzahtjevnije takmičenje u 2023. godini jer će našu delegaciju činiti preko 100 sportista i trenera.

Pored Evropskih igara, OK BiH radi na pripremi delegacija za učešće na još 3 velika višesportska međunarodna takmičenja u ovoj godini i to: EYOF Maribor 2023, Svjetske igre na pijesku „Bali 2023“ i Mediteranske igre na pijesku „Heraklion 2023“.

I pored 4 takmičenja u ovoj godini u organizaciji OK BiH, ne smijemo zaboraviti činjenicu da je ovo predolimpijska godina. Sportisti i njihovi treneri će se koncentrisati na kvalifikacije za Olimpijske igre Pariz 2024, a Olimpijski komitet BiH je donio

odлуku da će iskoristiti sve svoje mogućnosti da još više u ovoj predolimpijskoj i olimpijskoj godini pomogne sportistima kako bi ispunili olimpijsku normu, te ostvarili njihove i naše snove – prvu olimpijsku medalju za Bosnu i Hercegovinu.

24. maja u Visokom ćemo održati tradicionalnu proslavu Dana olimpizma. Cilj ove manifestacije je promocija učešća u sportovima u čitavom svijetu, bez obzira na starost, pol ili tjelesnu spremnost. Olympic Day je mnogo više od sportskog događaja, to je svjetski dan aktivnosti kada mladi naraštaji proslavljaju olimpijske vrijednosti - izvrsnost, prijateljstvo i poštovanje, a ujedno i tri osnovna stuba Olimpijskog dana - kretanje, učenje i otkrivanje. OK BiH će u 2023. i 2024. godni proslaviti tri velika jubileja. 24. septembra 2023. godine ćemo obilježiti 30. godišnjicu prijema OK BiH u Svjetsku olimpijsku porodicu. Na svečanom Zasjedanju MOK-a u Monaku, Olimpijski komitet BiH je primljen uz gromoglasan aplauz učesnika Zasjedanja.

8. februar 1984. godine će ostati dugo zapamćen u srcima svih Bosanaca i Hercegovaca, ali i srcima svih ljudi Ex-Yu i svijeta. Olimpijski komitet Bosne i Hercegovine će povodom ovog značajnog jubileja, obilježavanja 40. godišnjice ZOI Sarajevo 84 upriličiti program koji će okupiti eminentne sportiste i sportske radnike iz tog, ali i sadašnjeg vremena i na taj način sačuvati uspomenu na naše bogato olimpijsko naslijeđe. U isto vrijeme OK BiH će obilježiti i 5. godišnjicu EYOF-a Sarajevo i Istočno Sarajevo, događaja koji je ponovo ujedinio građane Bosne i Hercegovine pod sloganom „Stvaramo zajedno“ i uistinu je pokazao da „Sport uvijek gradi mostove i okuplja ljude u miru i solidarnosti“.

U duhu istog ovog slogana pozivamo vas, naše drage sportiste, naše drage sportske radnike i prijatelje sporta da nastavimo raditi zajedno na stvaranju boljih uslova za sve vas, sve nas i generacije koje dolaze.

Predsjednik OK BiH
Prof. dr Milanko Mučibabić

ODRŽANA 4. REDOVNA SJEDNICA GENERALNE SKUPŠTINE OLIMPIJSKOG KOMITETA BOSNE I HERCEGOVINE



U Olimpijskom komitetu BiH 12.04.2023. godine održana je 4. redovna Generalna skupština Olimpijskog komiteta BiH uz prisustvo delegata koji dolaze iz 39 sportskih saveza Bosne i Hercegovine, kojom je predsjedavao predsjednik OK BiH prof. dr Milanko Mučibabić.

Nakon Izvještaja Nadzornog odbora OK BiH, delegatima su prezentirani: Izvještaj o radu i Finansijski izvještaj za 2022. godinu koje je prezentirao predsjednik OK BiH prof. dr Milanko Mučibabić. Plan rada OK BiH za 2023. godinu je prezentirao potpredsjednik OK BiH Marijan Kvesić, a Finansijski plan za 2023. godinu i EU projekte je prezentirao potpredsjednik OK BiH dr sci. Izet Rađo. Delegati su jednoglasno usvojili prezentirane izvještaje i planove uz mnoštvo pohvala za aktivnosti i rad Olimpijskog komiteta BiH.

I pored izuzetno kompleksne finansijske situacije u kojoj vrhunski sport u BiH egzistira, u okviru minimalnog budžeta na državnom nivou i granta za vrhunski sport, svi delegati su izrazili veliko zadovoljstvo postignutim rezultatima i realiziranim aktivnostima Olimpijskog komiteta BiH i sportskih strukovnih saveza BiH kao nebudžetskih organizacija.

Predsjednik OK BiH prof. dr Milanko Mučibabić je rekao: „Drago mi je da su svi izvještaji usvojeni jednoglasno, da smo ispunili sve zacrtane programske i finansijske ciljeve, te da smo adekvatno i u skladu sa našim mogućnostima i misijom podržali naše najbolje sportiste.

I ova godina je izuzetno zahtjevna za Olimpijski komitet BiH jer nam predstoje putovanja na 5 višesportskih međunarodnih takmičenja i to: Evropske igre Krakow (Poljska), EYOF Maribor (Slovenija), Mediteranske igre na pijesku Heraklion (Grčka) i Svjetske igre na pijesku Bali (Indonezija) uz konstataciju da je EYOF u Italiji već završen.

Konstatovano je da Olimpijski komitet BiH kontinuirano nastavlja svoju kampanju „Sistemsko finansiranje vrhunskog sporta BiH“ prema nadležnim institucijama za sport i predstavnicima vlasti u BiH. S obzirom da je ovo predolimpijska godina neophodna je pomoći olimpijcima i Olimpijskom komitetu BiH kako bi što više sportista ispunilo olimpijsku normu i kako bi što kvalitetnije predstavili državu Bosnu i Hercegovinu na Olimpijskim igrama Pariz 2024.“

OLIMPIJSKI KOMITET BIH JE SVOJU PORODICU UVEĆAO ZA JOŠ DVA ČLANA NA 4. REDOVNOJ SJEDNICI GENERALNE SKUPŠTINE OK BIH



Olimpijski komitet BiH je svoju porodicu uvećao za još dva člana. Na 4. Redovnoj skupštini OK BiH, u članstvo Olimpijskog komiteta BiH primljeni su Kik boks savez BiH i Savez tajlandskog boksa BiH, te Olimpijski komitet BiH u svom članstvu sada broji 41 sportski savez Bosne i Hercegovine (30 olimpijskih i 11 neolimpijskih sportova).

Ovaj broj se iz godine u godinu uvećava što predstavlja ogroman kompliment za Olimpijsku porodicu BiH i rad Olimpijskog komiteta BiH.



OBILJEŽENO 500 DANA DO OLIMPIJSKIH IGARA PARIZ 2024



U prostorijama Olimpijskog komiteta BiH održan je prijem u organizaciji Francuske ambasade u BiH i Olimpijskog komiteta BiH povodom obilježavanja 500 dana do početka Olimpijskih igara „Pariz 2024“. U prisustvu mnogobrojnih zvanica obratili su se ambasadorica Francuske u BiH NJ.E. Christine Toudic, predsjednik OK BiH prof.dr Milanko Mučibabić kao i olimpijci, stipendisti OK BiH za OI Pariz 2024, Amel Tuka, Larisa Cerić i Mesud Pezer.

Predsjednik OK BiH prof. dr Milanko Mučibabić je rekao: „Veliko je zadovoljstvo da smo se u ovom hramu sporta danas okupili kako bi, zajedno sa našim partnerima iz Francuske ambasade, najavili najveći sportski spektakl na svijetu, Olimpijske igre Pariz 2024. Naši sportisti - stipendisti OK BiH, njih 14, se maksimalno spremaju kako bi ostvarili olimpijske norme, te postigli bolje rezultate u Parizu nego na prošlim Olimpijskim igrama u Tokiju. Domaćinu Igara Gradu Parizu, francuskom narodu i Francuskoj želim uspješnu i dobru organizaciju Olimpijskih igara „Pariz 2024“.



OBILJEŽENO 500 DANA DO OLIMPIJSKIH IGARA PARIZ 2024



Za 500 dana, tačnije 26. jula 2024, svečano se otvaraju 33. Ljetne Olimpijske igre „Pariz 2024“. Očekuje nas 19 dana vrhunskog sportskog nadmetanja u gradu koji je treći put nakon 1900.g. i 1924.g. domaćin Olimpijskih igara. Ovom prilikom biće obilježena i stota obljetnica OI 1924.g. Francuska će biti šesti put domaćin, uključujući i ljetne i zimske Olimpijske igre. Slogan Olimpijskih igara „Pariz 2024“ je „Igre širom otvorene“.

„Veliko je zadovoljstvo što imam priliku da skupa sa Olimpijskim komitetom BiH i bh. sportistima i olimpijcima u ovom prelijepom ambijentu Olimpijskog komiteta BiH obilježimo 500 dana do početka Olimpijskih igara u Parizu 2024. Želim posebno da istaknem Svečanu ceremoniju otvaranja Igru koja će se po prvi put u historiji održati na rijeci. Sigurna sam da će otvaranje Igru na Seni biti poseban doživljaj za sve učesnike. Želim uspješne pripreme i puno sportske sreće i uspjeha bh. timu na Olimpijskim igrama u Parizu“, rekla je NJ.E. Christine Toudic. Kompletnu vijest pročitajte na ovom [LINKU](#).



OK BiH NASTAVLJA KAMPAJNU ZA SISTEMSKO RJEŠAVANJE FINANSIRANJA BOSANSKOHERCEGOVČKOG SPORTA

Delegacija Olimpijskog komiteta BiH u posjeti Predsjedavajućem Predstavničkog doma Denisu Zvizdiću

Predsjedavajući Predstavničkog doma Parlamentarne skupštine BiH Denis Zvizdić primio je u radnu posjetu delegaciju OK BiH, predsjednika prof. dr Milanka Mučibabića, potpredsjednika dr sci. Izeta Rađu i generalnog sekretara doc. dr Saida Fazlagića.

Predsjednik OK BiH prof. dr Mučibabić i potpredsjednik OK BiH dr sci. Rađo su predsjedavajućeg Zvizdića upoznali o radu i projektima Olimpijskog komiteta BiH, kao i o trenutnom stanju bh. sporta i sportskog sistema, potrebama sportskih saveza i Olimpijskog komiteta BiH u sistemskom finansiranju, te izrazili razočarenje jer je državni budžet usvojen bez uvećanja stavke za sport BiH i vrhunske sportiste. Molbe za uvećanje državnog budžeta BiH je uputilo 39 sportskih saveza BiH i Olimpijski komitet BiH. Poseban osvrt je bio na devet zaključaka Okruglog stola OK BiH na temu sistemskog finansiranja vrhunskog sporta BiH, na kojem je učestvovalo 39 predstavnika sportskih saveza BiH. Navedenim zaključcima se i dalje zahtjeva uvećanje budžeta za sport na 1%, kao i promjena kriterija za raspodjelu granta Ministarstva civilnih poslova BiH kojim bi se novac dodjeljivao samo Olimpijskom i Paraolimpijskom komitetu BiH, sportskim savezima BiH i vrhunskim sportistima. Više pročitajte [OVDJE](#).



Delegacija OK BiH u posjeti Ministrici civilnih poslova Bosne i Hercegovine Dubravki Bošnjak



30. marta 2023. godine, novoizabrana ministrica civilnih poslova BiH Dubravka Bošnjak primila je u radnu posjetu delegaciju Olimpijskog komiteta BiH (OK BiH), potpredsjednike dr sci. Izeta Rađu i Marijana Kvesića, člana Izvršnog komiteta OK BiH Ivana Brkića, te generalnog sekretara doc. dr Saida Fazlagića.

Tokom sastanka ministrica Bošnjak je upoznata od predstavnika OK BiH o trenutnom stanju bh. sporta i sportskog sistema, uspjesima ali i poteškoćama na koje nailaze naši najbolji sportisti, te potrebama sportskih saveza i OK BiH u sistemskom pozicioniraju i finansiranju. Fokus razgovora je bio na devet zaključaka „Okruglog stola“ kojima se i dalje zahtjeva uvećanje svih budžeta za sport na 1%, kao i promjena kriterija za raspodjelu granta Ministarstva civilnih poslova BiH kojim bi se novac dodjeljivao samo Olimpijskom i Paraolimpijskom komitetu BiH i sportskim savezima BiH, te druga pitanja iz ovog dokumenta.

Delegacija OK BiH je naišla na veliko razumijevanje i zainteresovanost ministricice Bošnjak koja je izrazila spremnost za partnersku saradnju, te će učiniti sve, a u skladu sa svojim mogućnostima i ovlastima da se podrže i usvoje zaključci sa Okruglog stola OK BiH.

PREDSJEDNIK OK BIH PROF. DR MILANKO MUČIBABIĆ PRISUSTVOVAO SPORTSKOJ MANIFESTACIJI U BANJA LUCI



Predsjednik Olimpijskog komiteta Bosne i Hercegovine prof. dr Milanko Mučibabić prisustovao je manifestaciji 12. Dan fudbala Republike Srpske, tokom koje su nagrađeni najuspješniji fudbaler, najperspektivniji igrač, najbolji trener, sudija, fudbalski radnik, itd.

Takođe su uručena posebna priznanja za dostignuća u fudbalu. Priznanje Ambasador fudbala „Mihajlo Andrejević Andrejka“ dodjeljeno je Ivanu Ćurkoviću, Zlatna povelja „Miljan Miljanić“ je posthumno dodijeljena Siniši Mihajloviću, a Nagrada za životno djelo „Dr Milan Jelić“ pripala je Ranku Cvijiću.

GENERALNI SEKRETAR OK BIH, DOC. DR SAID FAZLAGIĆ UČESTVOVAO NA SASTANKU EOK MARKETING KOMISIJE U SPLITU

Doc. dr Said Fazlagić, generalni sekretar OK BiH učestvovao je na sjednici Marketing komisije Evropskih olimpijskih komiteta koja je održana u Splitu, 05.04.2023. Jedna od osnovnih zadaća Komisije je bila restrukturiranje Strategije i platforme marketinga, te marketinških aktivnosti EOK-a. Marketing komisija je dala punu podršku ideji da se Grad Split kandiduje za narednog domaćina Evropskih igara.



POSJETA PREDSTAVNIKA SVJETSKE INTERNACIONALNE KIK BOKS FEDERACIJE (WAKO) I TURSKE KIK BOKS FEDERACIJE

Olimpijski komitet Bosne i Hercegovine posjetili su potpredsjednik Svjetske internacionalne kik boks federacije (WAKO) gospodin Salim Kayici, koji je i potpredsjednik Evropske kik boks federacije i predsjednik Turske kik boks federacije, te gospodin Tümay Ünal-a, član Upravnog odbora Turske kick boks federacije, Elvedin Dubravac potpredsjednik Kik boks saveza BiH i Dragana Vitković član Upravnog odbora Kik boks saveza BiH. Na sastanku se razgovaralo o planovima i projektima koji imaju za cilj razvoj kik boksa u Bosni i Hercegovini, a kompletну vijest pročitajte [OVDJE](#).



“MEĐUNARODNI DAN SPORTA ZA RAZVOJ I MIR“ - VIDEO PORUKA PREDSJEDNIKA MOK-A THOMASA BACHA



U okviru “Međunarodnog dana sporta za razvoj i mir“, predsjednik Međunarodnog olimpijskog komiteta (MOK) Thomas Bach u video poruci je istakao jedinstvenu ulogu sporta i Olimpijskih igara u širenju globalnog mira.

“Sport spaja ljudе kroz mirno natjecanje”, rekao je predsjednik Bach, ističуći važnost sporta kao pokretačа mira, međukulturalnog

razumijevanja i solidarnosti u današnjem društву. Bach je također naglasio važnost usmjerenosti MOK-a i cijelokupnog olimpijskog pokreta na jačanje uloge sporta u omogućavanju doprinosa UN-ovim ciljevima održivog razvoja. “Jer to je ono što je naša misija: stavljanje sporta u službu mirnog razvoja čovječanstva”, zaključuje predsjednik Bach.

“Međunarodni dan sporta za razvoj i mir“ je godišnja proslava sporta kao pokretačа društvenih promjena i razvoja zajednice, stoga se OK BiH pridružuje MOK-u i olimpijskoj porodici u globalnoj poruci: Dajmo šansu miru!

Kompletну video poruku Predsjednika MOK-a pogledajte [OVDJE](#).

#WHITECARD KAMPAŃJA: “MEĐUNARODNI DAN SPORTA ZA RAZVOJ I MIR“

U sklopu “Međunarodnog dana sporta za razvoj i mir“, koji se obilježava 6. aprila, OK BiH i najbolji bh. sankaš Mirza Nikolajev pridružili su se globalnoj kampanji @peaceandsport, te uz #WhiteCard (#BijeliKarton) kao znak posvećenosti mirovnim naporima širom svijeta.

Premameđunarodnoj organizaciji Peace and Sport, koja promovira mir koristeći snagu sporta, #WhiteCard, “kao referenca na žute i crvene kartone u svijetu sporta, ne poziva na kažnjavanje, već na globalno promicanje mira.”

Inicijative temeljene na sportu ključne su za podsticanje izgradnje inkluzivnih i miroljubivih društava, stoga se OK BiH pridružuje olimpijcima i sportskim organizacijama širom svijeta u promociji sporta kao sredstva stvaranja napretka, jačanja ravnopravnosti i promicanja kulture mira.



EVROPSKE IGRE Krakow Malopolska 2023

EOK TIM IZBJEGLICA ĆE UČESTVOVATI NA EVROPSKIM IGRAMA



Evropski olimpijski komiteti (EOK) objavili su da će se EOK tim izbjeglica takmičiti na Evropskim igrama Krakov-Malopolska 2023.

EOK je prva kontinentalna asocijacija koja ima tim izbjeglica na svojim multisportskim događajima. Treće izdanje Igara održat će se između 21. juna i 2. jula, a EOK je potvrdio da će se troje taekwondo sportista i dvoje boksera koji predstavljaju novoformirani EOK tim izbjeglica pridružiti više od 7000 sportista u Poljskoj ovog ljeta.

Inicijativa je sprovedena u saradnji sa Olympic Refuge Foundation (ORF). ORF upravlja programom podrške sportistima izbjeglicama koji finansira Olimpijska solidarnost i upravljači će Olimpijskim timom izbjeglica MOK-a u Parizu 2024.

Predsjednik EOK-a Spyros Capralos istakao je važnost postojanja EOK tima izbjeglica na Evropskim igrama, te naglasio ulogu koju sport može nastaviti da igra u pokretanju mira u zajednicama.

Capralos: „Ponosan sam što mogu danas najaviti stvaranje tima izbjeglica Evropskih olimpijskih komiteta, koji će se takmičiti na Evropskim igrama u Krakovu-Malopoljskoj.

„Konflikti, progoni i klimatske promjene i dalje tjeraju milione ljudi da napuste svoje domove. Kada se nastane u novim zemljama, sport je više od alata za integraciju. Može pomoći da izbjegnu traumu, može dati sportistima fokus i osjećaj svrhe, pomoći im da ponovo izgrade svoje živote, stvore društvene mreže i još mnogo toga.

“Pet sportista koji će se takmičiti u Poljskoj dokaz su toga i znam da će se takmičiti s ponosom. Želim im svu sreću.” kompletan vijest pročitajte na ovom [LINKU](#).

UPALJEN JE PLAMEN MIRA ZA EVROPSKE IGRE 2023 KRAKOW MALOPOLSKA

Plamen mira za Evropske igre „Kraków-Małopolska 2023“ upaljen je na svečanosti u Ara Pacisu kojoj su prisustvovali predsjednik Republike Poljske Andrzej Duda i predsjednik Evropskih olimpijskih komiteta (EOK) Spyros Capralos. Višestruki poljski olimpijski šampioni Robert Korzeniowski i Anita Włodarczyk dobili su čast da budu nosioci baklje na ceremoniji, uoči prve evropske multisportske manifestacije koja se održava u Poljskoj između 21. juna i 2. jula 2023. To će biti najveći multisportski događaj čiji je Poljska domaćin. Više na linku [OVDJE](#).



SPORTSKI SAVEZI BIH

DŽUDO SAVEZ BOSNE I HERCEGOVINE

Europa judo kup za juniore i juniorke "Sarajevo 2023"



U organizaciji Judo saveza Bosne i Hercegovine, Europski judo kup za juniore i juniorke "Sarajevo 2023" okupio je 268 mladih natjecatelja iz 18 zemalja koji su se u obje konkurenkcije borili za medalje u sedam težinskih kategorija.

Prvo ovogodišnje natjecanje, "Sarajevo 2023", koje se nalazi u kalendaru Europske Judo Unije (EJU), a boduje se i za Svjetsku juniorsku rang listu IJF-a, opravdalo je prošlogodišnje priznanje najboljeg tehničkog organizatora svih europskih natjecanja, a do kraja godine Judo savez BiH očekuje organizacija Europskog kupa za seniore u Istočnom Sarajevu i Europa Opena (kvalifikacije za OI Pariz 2024) ponovno u Sarajevu.

Na dvodnevnom kupu Bosnu i Hercegovinu predstavljalo je 29 juniora i 29 juniorki, koji su osvojivši dvije srebrne i tri brončane medalje iskoristili priliku da dokažu kvalitet novih naraštaja jednog od najtrofejnijih sportova naše zemlje.

SAVEZ KLIZAČKIH SPORTOVA BOSNE I HERCEGOVINE

Priznanje za dobro organizovano obilježavanje Svjetskog dana klizanja



Od strane ISU i koordinatora za obilježavanje Svjetskog dana klizanja gospodina Ashley Arthingal Savezu klizačkih sportova BiH stiglo je priznanje za dobru organizaciju, kao i informacija da je Bosna i Hercegovina rangirana na 12 mjestu od 47 zemalja koje su uzele učešće u ovom događaju.

"First of all congratulations on organizing a wonderful WISD in your country. Bosnia was ranked #12 out of 47 countries...Once again – thanks a lot and looking forward to the second edition of WISD 2023 in Bosnia – hoping it gets bigger and more unique this time."

Iz Saveza ističu da su ponosni što su dio velike zajednice koja okuplja ljude iz cijelog svijeta sa različitim pozadinama, kulturama i životnim iskustvima.

TRIATLON I PENTATLON SAVEZ BOSNE I HERCEGOVINE

Triatlon i pentatlon savez Bosne i Hercegovine je u saradnji sa Europa Triathlon uspješno organizovao i realizovao petodnevni World Triathlon Coaches Level 1 Course




Triatlon i pentatlon savez Bosne i Hercegovine je u saradnji sa Europa Triathlon uspješno organizovao i realizovao petodnevni World Triathlon Coaches Level 1 Course, u periodu od 08.04. do 12.04.2023. godine, u hotelu Hollywood na Ilidži.

Kurs je međunarodnog karaktera i učestvovalo je 18 polaznika iz Estonije, Litvanije, Slovačke, Hrvatske, Slovenije, Srbije, Crne Gore, Grčke, Turske i Bosne i Hercegovine. Kurs su realizovali ovlašteni instruktori World Triathlon-a Željko Bijuk (Hrvatska) i Miloš Petelin (Slovenija).

Bosna i Hercegovina je dobila 6 novih trenera triatlona sa cetifikatom World Triathlona. To će omogućiti kvalitetniji razvoj triatlona u BiH, posebno kod mlađih kategorija.



TENISKI SAVEZ BOSNE I HERCEGOVINE ATP TOUR 250 | SRPSKA OPEN 2023



Od 17.04. do 23.04. godine u Banja Luci je održan ATP 250 teniski turnir "Srpska Open". Pobjednik turnira je bio Dušan Lajović, što je njegova druga po redu ATP titula na Tour-u.

Na manifestaciji su boravili i predstavnici Olimpijskog komiteta Bosne i Hercegovine, predsjednik prof. dr Milanko Mučibabić i potpredsjednik gosp. Marijan Kvesić koji su pratili mečeve bh. tenisera, tenisera iz regije kao i međunarodnih predstavnika.

STRELJAČKI SAVEZ BOSNE I HERCEGOVINE

Farah Oneščuk oborila četiri državna rekorda na juniorskom Prvenstvu Bosne i Hercegovine u streljaštvu

U nedjelju, 26. marta u streljuštu Zetra održano je Prvenstvo Bosne i Hercegovine u gađanju zračnim oružjem za juniorke i juniore. Na Prvenstvu je nastupilo 98 takmičara iz četrnaest klubova.

Najuspješniji takmičari su bili iz Streljačkog kluba Sarajevo, čija članica Farah Oneščuk je briljirala izuzetnim gađanjem i oborila četiri državna rekorda. Rezultat u kvalifikacijama od 628,3 kruga je novi državni rekord i za juniorke i seniorke, a rezultat od 262,2 kruga je novi finalni rekord takođe za juniorke i seniorke.

O kakvim rezultatima se radi govori i podatak da je ovogodišnja evropska prvakinja imala slabiji rezultat sa kojim je osvojila titulu evropske prvakinje.

Više o pravilima i rezultatima ostalih takmičara pročitajte [OVDJE](#).



BOKSERSKI SAVEZ BOSNE I HERCEGOVINE IZABRAN ZA DOMAĆINA JUNIORSKOG EVROPSKOG PRVENSTVA U 2024. GODINI

Bokserski savez BiH aktivno radi na promociji Olimpijskog boksa u BiH kao i jačanju Bokserskog saveza BiH kako na međunarodnoj sceni, tako i u Evropskoj bokserskoj konfederaciji (EUBC). Aktivnim zalaganjem i djelovanjem Savez je prepoznat kao kredibilan partner od strane EUBC-a, tako da je isti dana 17.04.2023 donio odluku da se Evropsko prvenstvo za juniore/juniorke u 2024. god. održi u Sarajevu.

Jedan od ciljeva ovog projekta jeste namjera da Sarajevo ponovno postane prepoznatljivo kao jedan od vodećih olimpijskih bokserskih centara u kojem bi se nakon ovog sportskog događaja organizovala u još većem broju međunarodna i domaća takmičenja te podstakao razvoj ovog sporta koji je proteklih godina neopravdano zanemaren. Evropsko prvenstvo će okupiti oko 500 takmičara i trenera iz cijele Europe, a osim sportskog dijela, organizatori će prirediti i stručne seminare, što je od neprocjenjivog značaja za boks u Bosni i Hercegovini.

Bokserski savez BiH je ponosan sto će imati priliku da organizuje i ugosti oko 40 zemalja na pomenutom prvenstvu jer je to jedan od najboljih načina za promociju olimpijskog boksa u BiH kao i odlična promocija naše prijestolnice za održavanje sportskih manifestacija.



KIK BOKS SAVEZ BOSNE I HERCEGOVINE EUROPEAN CUP SARAJEVO GRAND PRIX 2023



U Sarajevu je od 5-7. maja 2023. godine u sportskoj arenici hotela Hills održan Kickboxing Evropski kup na kojem je učestvovalo 962 takmičara iz 16 zemalja. U dobroj organizaciji ovoga kupa, koji je uvršten u zvanični kalendar Svjetske kickboxing asocijacije WAKO, najuspješnija je bila Hrvatska sa osvojenih 34

zlatne medalje, na drugom mjestu je bila Bosna i Hercegovina sa osvojenih 30 zlatnih medalja, dok je treće mjesto osvojila Bugarska sa 23 zlatne medalje.

Na Evropskom kupu učestvovalo su i reprezentacije Mađarske, Srbije, Austrije, Crne Gore, Slovenije, Moldavije, Slovačke, Sjeverne Makedonije, Izrele, itd.

Kik boks savez Bosne i Hercegovine sa tehničkim organizatorom Kickboxing akademijom „Ilidža“ su dobili pohvale za organizaciju od predsjednika Evropske kickboxing federacije, Istvana Kiraliya i tehničkog sekretara Svjetske kickboxing federacije, Romea Deše koji su svojim prisustvom, uz zemlje učesnice, uveličali značaj ovog takmičenja.

BH • TEAM

ATLETIKA

AMEL TUKA ČETVRTI NA EVROPSKOM DVORANSKOM PRVENSTVU U ISTANBULU



FOTO izvor: [Facebook Amel Tuka](#)

Najbolji bh. atletičar, olimpijac Amel Tuka osvojio je četvрto mjesto na 37. Evropskom dvoranskom prvenstvu. Amel je finalnu utrku na 800m završio s vremenom 1:47.90

Bravo i čestitamo Amelu!

ATLETIKA

MESUD PEZER SEDMI NA EVROPSKOM DVORANSKOM PRVENSTVU U ISTANBULU



FOTO izvor: [Facebook Mesud Pezer](#)

Bh. olimpijac, bacač kugle Mesud Pezer osvojio je sedmo mjesto u finalu 37. evropskog dvoranskog seniorskog atletskog prvenstva u Istanbulu.

Pezer je u finalu kuglu bacio na daljinu od 19,94 metara, a u kvalifikacijama 20,20 metara.

Nakon Evropskog dvoranskog prvenstva Pezer je nastupio i na 27. međunarodnom atletskom mitingu "Bar – 2023", na kojem nastupilo više od 250 takmičara iz devet država.

Naš atletičar je u prvom ovosezonskom nastupu na otvorenom slavio sa hicem dužine 21,15 metara.

Čestitke našim atletičarima i želimo im sreću na putu ka Olimpijskim igrama Pariz 2024.

PLIVANJE

LANA PUDAR ISPLIVALA NORMU ZA SVJETSKO PRVENSTVO

U Banja Luci je u periodu od 29.04 - 30.04.2023. godine održan XIV Međunarodni plivački miting "22. April", na kome je nastupilo oko 400 plivača iz 8 država: Njemačke, Austrije, Slovenije, Srbije, Hrvatske, Crne Gore, Kine i Bosne i Hercegovine.



Lana Pudar je u disciplini 100m delfin isplivala vrijeme 58.32, što je A norma za Svjetsko seniorsko prvenstvo koje će se održati u japanskom gradu Fukuoka u periodu od 23. do 30.07. ove godine.

Ovo vrijeme je svega 40 stotinki slabije od A olimpijske norme za ljetne olimpijske igre "Paris 2024". Čestitke! #RoadToParis2024

PLIVANJE

IMAN AVDIĆ ISPLIVALA NORMU ZA SVJETSKO PRVENSTVO



Mlada olimpijska nada, Iman Avdić, je na Državnom prvenstvu isplivala normu za Svjetsko prvenstvo u Japanu u disciplini 400 metara slobodno.

Iman je takođe oborila i dva državna rekorda: na 400 i 1500 metara slobodnim stilom.

Čestitke!



TAEKWONDO

ADA AVDAGIĆ ZLATNA NA KVALIFIKACIJAMA ZA EVROPSKE IGRE 2023



Tokom kvalifikacionog turnira za Evropske igre Krakow Malopolska, održanog 09.04.2023. u Bukureštu, naše predstavnice su osvojile dvije medalje, a Bosna i Hercegovina treće mjesto u ukupnom plasmanu.

Naše takmičarke Ada Avdagić i Džeđla Makaš naše su se u finalu u kategoriji do 49 kilograma, gdje je Ada Avdagić ostvarila pobjedu, te tako osigurala nastup na Evropskim igrama na kojima će takođe učestvovati Nedžad Husić i Dinko Šegedin.

Čestitamo #BHTeam!

TAEKWONDO

MEDALJE ZA OK BIH STIPENDISTE NA EVROPSKOM KLUPSKOM TAEKWONDO PRVENSTVU

Taekwondo predstavnici su osvojili devet medalja za Bosnu i Hercegovinu na Evropskom klupskom taekwondo prvenstvu u Sofiji, među kojima su OK BiH stipendisti Nedžad Husić (srebro) i Marija Jokić (zlatno).



Nedžad Husić je u kategoriji seniora u konkurenciji 27

takmičara osvojio srebrenu medalju. Dok je Marija Jokić osvojila zlatnu medalju u kategoriji juniorki do 68 kilograma. Rezultate ostalih predstavnika pročitajte [OVDJE](#).

TAEKWONDO

NEDŽAD HUSIĆ: DVA SREBRA ZA BH. OLIMPIJCA NA G2 TURNIRIMA



Bh. taekwondoista olimpijac Nedžad Husić osvojio je srebro na Sofia Open G2 turniru. Na putu do srebrne medalje savladao je predstavnike Kipra, Danske, Slovenije i Turske. Nažalost, zbog povrede Nedžad je predao borbu protiv predstavnika Velike Britanije.

Husić je nastupio i na G2 turniru u Belgiji gdje je osvojio drugo mjesto. U kategoriji do 74 kilograma bh. predstavnik je savladao protivnike Azerbejdžana, Kine te ponovo Azerbejdžana u trećem kolu, dok je u polufinalu bio bolji od predstavnika Belgije. Nedžad je finalu borbu predao takođe zbog povrede.

Čestitke i srećno u nastavku kvalifikacija #RoadToParis2024!

KOŠARKA | Pretkvalifikacije za Olimpijske igre Pariz 2024



Muška košarkaška reprezentacija Bosne i Hercegovine učestvovat će u pretkvalifikacijama za Olimpijske igre, koje se naredne godine održavaju u Parizu.

Evropske pretkvalifikacije za OI održat će se na dva turnira, po osam selekcija na svakom (smještenih u grupe po četiri ekipe). U glavni žrijeb kvalifikacija ući će pobjednici turnira.

Osim naših Zmajeva, u pretkvalifikacijama učestvuju i reprezentacije Belgije, Hrvatske, Češke Republike, Estonije, Mađarske, Islanda, Izraela, Nizozemske, Sjeverne Makedonije, Poljske, Portugala, Švedske, Turske, Ukrajine i Bugarske. Pretkvalifikacioni turniri na rasporedu su od 12. do 20. avgusta ove godine. Sretno #BHTeam!

RUKOMET | Muška rukometna reprezentacija BiH izborila plasman na Evropsko prvenstvo

Rukometna reprezentacija Bosne i Hercegovine je u prepunoj dvorani u Cazinu savladala selekciju Slovenije rezultatom 27:26, i time izborila plasman na Evropsko prvenstvo koje će se održati u januaru 2024. godine u Njemačkoj.

Naša reprezentacija je slavila i u zadnjem meču kvalifikacija protiv selekcije Crne Gore koji je održan 30.04.2023. u Podgorici.

Čestitke i srećno na EP 2024!



FOTO izvor: [Facebook Rukometni savez BiH](#)

DŽUDO | Mlade nade judo sporta u BiH nastavljuju nizati medalje na natjecanjima IJF Tour za kadete i juniore

Mlade nade judo sporta u Bosni i Hercegovini nastavljuju nizati medalje na natjecanjima IJF Tour za kadete i juniore, te su na prethodnim natjecanjima ostvarili odlične rezultate i upisali bodove za Svjetsku kadetsku i juniorsku ranking listu.

EUROPA KUP ZA KADETE NAPULJ 2023:
Ivan Miličević, 3. mjesto do 81kg
Ivana Buntić, 3. mjesto do 63kg

AFRIČKI KUP ZA KADETE TUNIS 2023:
Amina Merjem Hebib, 2. mjesto do 63kg
Hrvoje Knezović, 2. mjesto do 70kg
Johanna Elisabeth Klinger, 2. mjesto do 90kg
Korina Džidić, 3. mjesto do 63kg

AFRIČKI KUP ZA KADETE ALŽIR 2023:
Amina Merjem Hebib, 3. mjesto do 63kg

AFRIČKI KUP ZA JUNIORE TUNIS 2023:
Amina Merjem Hebib, 3. mjesto do 63kg

EUROPA KUP ZA JUNIORE SARAJEVO 2023:
Lazar Ždrale, 2. mjesto do 81kg
Lana Bjelica, 2. mjesto preko 78kg
Uroš Mačar, 3. mjesto do 73kg

Nina Čabo Grubišić, 3. mjesto do 70kg
Lana Lubura, 3. mjesto do 78kg

Čestitke!



BICIKLIZAM | Lejla Njemčević nastavlja sjajne rezultate



Lejla Njemčević je u martu mjesecu sa Stefanie Dohrn osvojila drugo mjesto u generalnom plasmanu na UCI SHC utrci Andalucia Bike Race u Španiji. Osvajanjem drugog mjesta Njemčević je upisala 180 UCI bodova za svjetsku maraton ranking listu.

U nastavku takmičarskog perioda, najbolja bh. biciklistkinja je dominantnom vožnjom upisala pobjedu u XCO UCI C1 utrci u Hrvatskoj i osvojila novih 60 UCI bodova.

Lejla je krajem aprila postala po 18. put državni prvak, te zauzela prvo mjesto na svjetskoj UCI maraton ranking listi.

SAMBO | Evropsko sambo prvenstvo za seniore, juniore i kadete



Predstavnici Bosne i Hercegovine u sambu, članovi Sambo kluba Neretva učestvovali su na Europskom sambo prvenstvu za seniore, juniore i kadete. Šampionat Europe održao se u gradu Haifa u Izraelu, a učestvovalo je 26 država. Zemlje učesnice bile su SVK, LAT, GEO, GRE, CYP, ARM, AZE, RUS, BLR, NED, BUL, SRB, BEL, ISR, HUN, MDA, SLO, BIH, GER, ESP, ROU, CRO, ITA, FRA, ISL i MKD.

Članovi mostarske Neretve zajedno sa njihovim trenerom, g. Majom Češkom otišli su na ovo prestižno natjecanje i opet kao i prošle godine opravdali svoj odlazak, vrativši se sa osvojenim odličjima. Prvu medalju u combat sambu ikad za BiH osvojio je Josip Previšić u kategoriji do 88 kg. Previšić je osvojio brončano odličje i tako se upisao u povijest ovog sporta u našoj zemlji. Dan poslije Previšić je nastupio u sportskom sambu te i tu napravio sjajan rezultat osvojivši 5. mjesto.

Drugi osvajač medalje za SK Neretva i BiH na Europskom sambo prvenstvu bio je Marino Dugandžić koji je nastupio također u dvije discipline i napravio sjajan uspjeh. U sportskom sambu osvojio je 5. mjesto, dok je u combat sambu osvojio brončanu medalju. Pomenutom dvojcu bh. reprezentativaca ovo je bio prvi nastup ikad u navedenoj disciplini i to u seniorskoj konkurenciji.

BRZO KLIZANJE | "ALPE ADRIA TROPHY", CELJE

Juniorski reprezentativci Bosne i Hercegovine u brzom klizanju (Short Track), Ermin Raščić i Nedim Muzaferović, uz podršku Saveza klizačkih sportova Bosne i Hercegovine, nastupili su na međunarodnom takmičenju "Alpe Adria Trophy", koje je održano 1. i 2. aprila u Celju, Slovenija.

U konkurenciji 172 takmičara iz 9 zemalja, naši reprezentativci imali su dobar nastup. Ermin Raščić zauzeo je 2. mjesto i osvojio je srebrenu medalju, dok je Nedim Muzaferović zauzeo 6. mjesto. U Savezu su zadovoljni nastupom i plasmanom Raščića i Muzaferovića u Celju. S obzirom da obojica naših reprezentativaca pokazuju kontinuirani napredak, u nastavku klizačke sezone možemo od njih očekivati još bolje rezultate.



KARLING | MEĐUNARODNI KARLING TURNIR "LJUBLJANA OPEN 2023"



Karling tim Bosne i Hercegovine je krajem aprila učestvovao na međunarodnom turniru u Sloveniji „Ljubljana Open 2023“. Na turniru je nastupilo 30 ekipa iz 15 zemalja sa tri kontinenta, Evrope, Amerike i Azije. BiH tim je završio turnir sa dvije pobjede nad predstavnicima Slovenije i Češke Republike, te dva poraza, zauzevši 18. mjesto u konačnom poretku. Čestitke i srećno na budućim takmičenjima.

GIMNASTIKA | NAJAVA NASTUPA: SENIORSKO EVROPSKO PRVENSTVO BAKU 2023 I SVJETSKI JUNIORSKI ŠAMPIONAT CLUJ



Gimnastički savez BiH nastavlja uspješne nastupe na međunarodnoj sceni. GS BiH i seniorska Reprezentativna selekcija ritmičke gimnastike BiH u konkurenciji 37 država Evrope od 17. do 21. maja 2023. godine će se takmičiti na Evropskom prvenstvu RGI, Baku, Azerbejdžan.

U julu mjesecu bh. juniorsku reprezentaciju očekuje nastup na Svjetskom juniorskom šampionatu RGI, Cluj Napoca, Rumunija.

CHEERLEADING | BOSNA I HERCEGOVINA JE SUDJELOVALA NA SVJETSKOM CHEERLEADING PRVENSTVU U AMERICI NAKON 8 GODINA

Sportašice Hrvatskog cheerleading kluba Široki su sudjelovale na Svjetskom cheerleading prvenstvu koje se održalo u Orlandu na Floridi.

Svjetsko cheerleading prvenstvo se svake godine održava u Walt Disney World u Orlandu, USA. Prvi tjedan održava se svjetsko reprezentativno prvenstvo, a drugi tjedan svjetsko klupsко prvenstvo.

Valentina i Natalija zajedno sa trenericom Nikolinom dale su sve od sebe da Bosnu i Hercegovinu predstave u najboljem svjetlu na svjetskom prvenstvu na kojem je sudjelovalo 3 200 sportaša iz 66 zemalja.



Bez priprema i sulova koje imaju ostale djevojke, oduševile su sve prisutne svojim nastupima. Pobrale su simpatije, stekle iskustvo, upoznale mnoge sportaše i trenere te dogovorile buduće suradnje. Nažalost na Prvenstvu za reprezentacije se nisu plasirale u finale, u konačnom poretku osvojile su 27 mjesto. Nakon reprezentativnog, uslijedilo je klupsko Prvenstvo gdje su djevojke unatoč ozljedi nastupile u finalu i osvojile 19 mjesto.

26.03.2023. godine održano je Državno Cheerleading prvenstvo u Nevesinju

U Nevesinju je održano Cheerleading prvenstvo Bosne i Hercegovine u organizaciji Cheerleading saveza Bosne i Hercegovine, Plesnog i cheerleading kluba Let's Dance Nevesinje. Pokrovitelj prvenstva je bila Općina Nevesinje. Prvenstvo su sudili ICU suci iz Mađarske, Hrvatske i Italije.

U cheerleading disciplinama najbolje rezultate je imao Hrvatski cheerleading klub Široki, dok je performance cheer prvenstvo osvojio Cheerleading i plesni klub Erigo D Mostar.

Na prvenstvu se natjecalo preko 1 000 sportaša i sportašica iz 8 gradova i općina BiH: Široki Brijeg, Mostar, Nevesinje, Gacko, Ledinac, Ljubuški, Bileća i Čapljina.

01.04.2023. godine održana audicija za cheerleading i performance cheer reprezentaciju BiH

Prvi put u povijesti Bosna i Hercegovina će sudjelovati na Europskom cheerleading prvenstvu koje se od 30.06. do 02.07. održava u Veroni u Italiji. Tim povodom Cheerleading savez Bosne i Hercegovine organizirao je audiciju za pred juniorski i juniorski uzrast koja se 01.04. održala u Nevesinju.

EU PROJEKTI

ERASMUS+ PROJEKAT MLEA: ZAVRŠNI TRANSNACIONALNI SASTANAK I FINALNA KONFERENCIJA PROJEKTA



Dvogodišnji međunarodni Erasmus+ projekat posvećen dualnim karijerama sportista završen je u martu mjesecu Finalnom konferencijom u Zagrebu.

Olimpijski komitet Bosne i Hercegovine, partner na projektu MLEA - Micro Learning entrepreneurship for athletes, koji se sufinansira sredstvima

Evropske unije u okviru programa Erasmus+, prisustvovao je sedmom partnerskom sastanku održanom 13.03.2023. godine i Finalnoj konferenciji 14.03.2023. godine, u prostorijama Zagrebačke škole ekonomije i menadžmenta.

Završni Multiplier Sport Event otvorili su članica Međunarodnog olimpijskog odbora gospođa Kolinda Grabar Kitarović, ministrica sporta i turizma Republike Hrvatske gospođa Nikolina Brnjac i dekan Zagrebačke škole ekonomije i menadžmenta Mato Njavro. Sastanku su također prisustvovali predstavnici poslovnih škola iz Njemačke, Švedske i Hrvatske, Evropske univerzitetske sportske asocijacija kao i Olimpijskog komiteta Srbije, Hrvatske i Slovenije.

Na sastanku se razgovaralo o uspostavljanju online edukacije koja će biti posebno kreirana za aktivne i bivše sportiste na temu mikro učenja u poduzetništvu te sticanju neophodnih znanja i vještina kako bi se olakšao prelazak iz sportske u preduzetničku karijeru. E-platforma je u završnoj fazi i bit će dostupna široj javnosti u mjesecu aprilu koja će sadržavati 10 modula.

Tokom Konferencije su prezentovani rezultati samog projekta:

Rezultat 1/2 - Analiza, znanstveni rad i proces snimanja mikroučenja, Martin Carlsson Wall (SSE)

Rezultat 3 - Canvas model; E-platforma, prof. dr Sascha Schmidt

Rezultat 4 – Prezentacija platforme za gemifikaciju, Mirna Koričan Lajtman (ZSEM)

U sklopu Finalne konferencije „MLEA“ održane su dvije panel diskusije, All Star i Young Hopeful na kojima su gostovali vodeći stručnjaci i uspješni hrvatski sportisti, a razgovaralo se o sljedećim temama:

Problemi sa kojima se susreću sportisti nakon završetka sportske karijere;
Školski sistem i sportisti;

Poduzetničke sposobnosti kod sportista i bivših sportista;

Potencijal i prilike za sportiste na tržištu rada;

Razvoj specijalizovanog kurikuluma o poduzetništvu za sportiste i bivše sportiste;

Diseminacija projekta tokom implementacije i nakon Finalne konferencije.

Ovaj dvogodišnji međunarodni Erasmus+ projekat posvećen je sportistima kojima je zahtjevno pratiti i uskladiti profesionalnu sportsku karijeru i obrazovanje, što često rezultira njihovom nepripremljeničću za tržište rada.

OLIMPIJSKI KOMITETI EU U VELIKOJ MISIJI KLIMATSKIH PROMJENA OK BiH je sudjelovao u trodnevnoj edukaciji službenika za klimatske akcije

Modul 2 tečaja osposobljavanja službenika za klimatske akcije u sklopu Erasmus+ projekta „OCEAN“ (Olimpijski komiteti Europe na putu ka karbonskoj neutralnosti) održan je od 18. do 20. aprila putem platforme ZOOM.

Fokus tečaja, na kojem je uz partnerske olimpijske komitete Europe sudjelovao i OK BiH, bio je na definiranju uloge službenika za klimatske akcije (ili upravitelja održivosti); tj. opštih zadataka i ciljeva te interakcije s unutarnjim i vanjskim akterima.

Održan je i debriefing Modula 1, tokom kojeg su predstavljene inicijative koje su partnerski olimpijski komiteti počeli da realizuju na individualnom i organizacionom nivou. OK BiH je odabran kao jedan od četiri nacionalna primjera aktivne i uspješne provedbe projektnih aktivnosti u okviru projekta OCEAN, čime je otvorena prilika za kratku prezentaciju realiziranih aktivnosti za mjesec mart i april tokom treće sesije Modula 2.

Podsjećamo, koristeći sport kao jedan od najmoćnijih alata za pozitivan uticaj na društvo, OK BiH kao dio velike olimpijske porodice ponosan je na suradnju sa zemljama partnerima Europske unije i 18 olimpijskih komiteta Europe u realizaciji projekta OCEAN.

Samo zajedničkim radom možemo stvoriti put do održivog razvoja i ugljične neutralnosti!

“SPORTS AS VALUE” KICK-OFF SASTANAK (TIRANA, ALBANIJA)



Dana 30.03.2023. godine u Tirani, Republika Albanija, održan je uvodni radni sastanak u sklopu Erasmus+ projekta “Sports as Value” (Sport kao vrijednost) čiji je domaćin bio Olimpijski komitet Albanije (NOK Albanija).

Tokom dvodnevnog sastanka projektnim partnerima su predstavljeni temeljni ciljevi i odgovornosti, te je postavljen plan rada i komunikacijskih aktivnosti za 2023. i 2024. godinu. Sports as Value je Erasmus+ projekt izgradnje kapaciteta u području sporta u kojem su se zemlje Zapadnog Balkana i EU udružile radi zajedničkog cilja: integracije pozitivnih vrijednosti u sportsku praksu i izgradnje jače zajednice kroz sport i promicanje EU vrijednosti.



**Co-funded by
the European Union**

OCEAN PROJEKAT

KLIMATSKE PROMJENE: "DJELUJTE SADA ILI ĆE BITI PREKASNO!"

Počele uvodne, edukativne pripreme u OK BiH

Naučnici su objavili "posljednje upozorenje" za klimatsku krizu, dok rastuće emisije gasova guraju svijet na rub nepopravljive štete koju samo brza i drastična akcija može spriječiti. Međuvladin panel o klimatskim promjenama (IPCC), sastavljen od vodećih svjetskih klimatskih naučnika, prije par dana je objavio završni dio svog šestog izvješća o procjeni. Za sastavljanje sveobuhvatnog pregleda izvješća o klimatskoj krizi, za više od stotinu naučnika, trebalo je osam godina i sastoji se od hiljade stranica, ali se sveo na jednu jedinu poruku: "Djelujte sada ili će biti prekasno!" - prenosi Guardian.

Olimpijski komitet Bosne i Hercegovine dio je velike porodice olimpijskih komiteta iz EU (18 partnera), Međunarodnog olimpijskog komiteta (MOK), Asocijacije nacionalnih olimpijskih komiteta (ANOK), ÖKO ekološkog Instituta iz Njemačke, uz koordinatora Evropskih olimpijskih komiteta u projektu "OCEAN". Koristeći sport kao jedan od najsnažnijih alata za pozitivni uticaj na društvo, EU zemlje partneri projekta i Olimpijska porodica shvatili su ovo kao važan poziv. Uzimajući u obzir činjenicu da klimatska kriza direktno utiče i na sport, te ugrožava, čak i prijeti nestanku određenih sportova povećavanjem temperature, Olimpijski komitet Bosne i Hercegovine je već krenuo sa određenim strateškim koracima.



Počele su interne edukacije i pripreme uposlenika i saradnika za podizanje svijesti o ovoj tematiki, globalnom kontekstu i njegovom uticaju na sport i život općenito.

Pred nama su važna i kontinuirana nastojanja za promjenama i ubrzanim djelovanjem kada je ova tematika u pitanju.

Cilj edukacija jeste osnaživanje olimpijskih komiteta u cilju izgradnje kapaciteta i vještina za smanjenje emisije štetnih gasova, te mjerjenje karbonskog otiska, kao i ojačavanje internih snaga za dobro upravljanje klimatskim promjenama. Konačni cilj jeste izraditi nacionalnu strategiju i uključiti sve važne interesne strane (stakeholder-e) iz BiH u ovu planetarno važnu temu.

Za kraj, citirat ćemo glavnog tajnika UN-a Antónia Guterresa, koji je na posljednjem samitu rekao: "Ovo je izvješće jasan poziv da se masovno ubrzaju klimatski naporovi svake zemlje i svakog sektora i u svakom vremenskom okviru. Naš svijet treba klimatske akcije na svim frontama: sve, svugdje, sve odjednom."

INTERVJU SA... **ADOM AVDAGIĆ** taekwondo



OK BiH: Ada, kako i kada si počela trenirati taekwondo i ko je najzaslužniji za tvoj uspjeh?

ADA AVDAGIĆ: Taekwondo sam počela trenirati sa nepunih sedam godina. Za moj uspjeh najviše su zaslužni moji roditelji i moj trener koji su mi najveća podrška kako u teškim tako i u sretnim trenucima svih ovih godina mog aktivnog bavljenja taekwondo sportom. Naučili su me najbitnjim životnim vrijednostima: disciplini i samodisciplini, istrajnosti, upornosti, predanosti kao i dosta drugih pozitivnih stvari. Taekwondo je od prvog mog treninga postao i ostao moja velika ljubav.

OK BiH: Prošle godine si prešla u seniorsku kategoriju. Koliko je zahtjevan prelazak iz juniorske u seniorsku konkurenciju i da li si zadovoljna ostvarenim rezultatima?

A. AVDAGIĆ: Težak je svaki prelazak čak iz težinske kategorije u drugu kategoriju, a naročito iz juniorske u seniorsku konkurenciju. Ja sam se još u izlaznoj godini juniora počela takmičiti u seniorskoj konkurenciji, da bi mi bilo lakše poslije kad zvanično pređem u seniorke. Kao juniorka sam napravila veliki pomak u seniorskoj konkurenciji u svojoj kategoriji osvojivši dvije bronzane medalje na G2 bodovnim turnirima, osvojivši svoje prve bodove koji su me pozicionirali u top 100 na svjetskoj seniorskoj listi. Trenutno sam na 61. mjestu u konkurenciji 528 takmičarki. Seniorska konkurencija je totalno drugačija. Tu imate takmičarke od 17-33 godine starosti iza kojih je iskustvo i jak mentalni pristup. Seniori su stalna kategorija i tu se susrećete sa olimpijskim i svjetskim medaljistima. Ja koja imam 17 godina dobijem protivnicu koja ima, recimo 30 god. Trebalo mi je malo vremena da posložim te neke velike razlike u mojoj glavi, ali sad s tim nemam nikakav problem. Jednostavno, poštujem svakoga i ne respektujem više nikoga od protivnica na tatamiju. Treba biti uporan, raditi na sebi, biti istrajan u onome što volimo i rezultati će vremenom neminovno doći.



OK BiH: Nedavno si se kvalifikovala za učešće na Evropskim igrama Krakow Malopolska 2023. Najmlađi si kvalifikovani učesnik bh. tima, kakva su tvoja očekivanja od nastupa na EI 2023?

A. AVDAGIĆ: Da, kvalifikovala sam se na Evropske igre 2023, presretna sam naravno ponajviše zbog činjenice da je to moj prvi veći seniorski uspjeh, a i što ću imati priliku da predstavljam svoju državu na jednoj tako velikoj sportskoj manifestaciji. Cijeli pripremni period je bilo velikih mojih odričanja, a paralelno sa mnom "istrpjeli" su moji roditelji i trener. To je bio moj cilj i kruna ovog dosadašnjeg rada svih ovih godina - plasman na jedno takmočenje. Uvijek dajem svoj maksimum. Bilo je jako teško samom činjenicom da samo prvo mjesto u kvalifikacijama vodi ka učešću na Evropskim igrama.

To mi je stvaralo veliki pritisak, ali uspjela sam i dokazala prvo sebi pa drugima, da ja to mogu. Jako sam ponosna i zahvalna dragom Bogu i svima koji me podržavaju, naročito svojoj porodici, svom treneru Kolja Ibrahimu te Olimpijskom komitetu BiH na ukazanom povjerenju bez kojih sve ovo ne bi bilo moguće.

Na Evropske igre idem optimistično i sa pozitivnom energijom. Kao i uvijek, nadam se pozitivnom ishodu. Želim da ponosno predstavim svoju zemlju u najboljem svjetlu i da branim boje naše zastave na tako velikom evropskom događaju. Daću sve od sebe za sve nas i našu zemlju.



OK BiH: Koji je tvoj najbolji osjećaj u sportu?

A. AVDAGIĆ: Pa najbolji osjećaj u sportu je taj što ste uvijek pozitivni i sretni. Onaj trenutak kad osvojite medalju, pogotovo zlatnu i kad se ponosno popnete sa svojom zastavom na postolje kao prvi, a dolazite iz male zemlje koja je bolja od svih ostalih velesila. Osjećaj je predivan, emocionalno neopisivo.

OK BiH: Učenica si II razeda Pete gimnazije. Da li je naporno uskladiti školske obaveze, treninge, pripreme i takmičenja?

A. AVDAGIĆ: Jako je teško uskladiti školske obaveze, treninge i takmičenja. Uobičajeno je da tokom cijele sezone imam 2 treninga dnevno, ponekad i tri. Putujem jako često na takmičenja, izostajem dosta iz škole pa onda pokušavam da stignem gradivo. Naravno, kolektiv u mojoj školi me podržava, profesori mi izlaze u susret i jako sam sretna što sam okružena tako divnim profesorima i priateljima, pa mi je sve puno lakše. Moja porodica je angažovana maksimalno oko mene, moj trener mi također jako puno pomaže u svim segmentima. U biti, kad nešto volite srcem i dušom, ništa nije teško i neostvarivo.

OK BiH: Kako najviše voliš provoditi slobodno vrijeme i koja je tvoja poruka mladim?

A. AVDAGIĆ: Jako malo imam slobodnog vremena, a i kad ga imam, najviše volim da ga provedem sa svojom porodicom. U slobodno vrijeme volim da crtam, čitam knjige, volim pogledati dobre filmove, naročito u bioskopima.

Moja poruka mladima je da se bave onim što vole i što ih ispunjava, čini sretnim, da naporno rade i da istraju u svojim ciljevima. Naravno nije ništa lako, uvijek ima uspona i padova, ali najvažnije je ustati poslije svakog pada još snažniji i krenuti naprijed prema svom cilju. Odustati po meni, znači odustati od samog sebe.



ZAVIRITE U DRUŠTVENE MREŽE OK BiH (klikom na sliku)

Modul 2 tečaja ospozobljavanja službenika za klimatske akcije u sklopu Erasmus+ projekta „OCEAN“ (Olimpijski ...
Прикажи још



okbih.ba

OK BiH je sudjelovao u trodnevnoj edukaciji službenika za klimatske akcije



OK BiH | Gostovanje predsjednika OK BiH prof. dr Milanka Mučibabića u emisiji...
Olympic Committee of Bosnia and Herzegovina · 133 pregleda · pre 1 godine



olimpijski_komitet_bih



Свија се кориснику strahinja_eric и још 6



Pratite nas na društvenim mrežama:
(klikom na ikone)



©2023. Olimpijski komitet Bosne i Hercegovine. Sva prava
zadržana.

www.okbih.ba

Specijalnu zahvalnost dugujemo sponzorima i partnerima OK BiH.
Klikom na logo posjetite njihove oficijelne stranice.



Moja priča.

